

ডানপিটে

(গল্পগ্রন্থ - যাত্রাবদল)

যে সময়ে আমাদের গল্পের শুরু, কাশীতে তখন উৎকৃষ্টলাচ্ছাদার রাবড়ি পাঁচ আনা সের বিক্রয় হইত, ল্যাংড়া আমটাকায় এক পণ, মহিষের দুধ টাকায় পাকি বারো সের।¹

কাশীতে তখন স্কুল-কলেজ বেশি ছিল না, শহরের বসতি আরো ঘিঞ্জি ছিল, তেলের আলো জ্বলিত রাস্তায়, অত্যন্ত অপরিষ্কার ছিল শহরের অবস্থা, গাড়ি-ঘোড়া ছিলকম।বুঢ়ুয়ামঙ্গলের মেলার সময় গঙ্গার ধারে ধনীদেব দু'চারখানা নতুন ধরনের ভিক্টোরিয়া কি ফিটন দেখা যাইত। এক্সা ও স্প্রিং-বিহীন টাঙা ছিল প্রধান সম্বল, শহরেরবাহিরে উটের গাড়ি চলিত।

গণেশ মহল্লাতে তখন রামজীবন চক্রবর্তীর খুব নাম ওপসার-প্রতিপত্তি। কমিসারিয়েট বিভাগে বড় চাকুরিতে তিনিবেশ দু'পয়সা রোজগার করিয়াছিলেন, তবে হাতে রাখিতেপারিতেন না। সেকালের রীতি অনুযায়ী তার কাশীর বাড়িটাছিল একটা হোটেলখানা। চাকুরি-প্রয়াসী বা অক্ষম ওনিরাশয় আত্মীয়স্বজন ও স্ব-গ্রামের লোকের ভিড়ে বাড়িতেপা দিবার স্থান থাকিত না।

রামজীবনবাবুর চার ছেলে, বড় তিনটি ভয়ানকডানপিটে, স্কুলে যাইবার নাম করিয়া পথে মারামারি করিত, ঘুড়ি উড়াইত, স্কুলের সময়টি কাটাইয়া ছুটির সময়ে বাড়িফিরিত। ইহাদের উপযুক্ত সঙ্গীও জুটিয়াছিল দশ-বারোজনপাড়ার ছেলে, সকলেই সমান ডানপিটে, সমানই তাদেরবিদ্যার্জন-স্পৃহা। স্কুলের সময় দল বাঁধিয়া বাড়ি হইতে বাহির হইয়া হয়তো শহরের বাহিরে পথের ধারের এক বড়পেয়ারা বাগানে ঢুকিয়া ফল ছিঁড়িয়া খাইয়া ফেলিয়া ছড়াইয়ানষ্ট করিয়া বেলা চারটার পরে বাড়ি ফিরিত। কোনোদিন বাসারনাথের পথে কোথাও চড়ুইভাতি করিতে গেল। মাসেরমধ্যে পনেরো দিন এইরকম চলিত।

গণেশ-মহল্লাতে প্রেমচাঁদ মুখুয়ে নামে নদীয়া জেলারএকজন বৃদ্ধ ব্রাহ্মণ কাশীবাস করিতেন। তাঁর এক পিতৃমাতৃহীন ভাইপো তাঁর কাছে থাকিয়া নামে বিদ্যাভ্যাসকরিত, কাজে সে ছিল উপরোক্ত ডানপিটে স্কুল-পালানো ছেলের দলের একজন চাঁই সদস্য। ভ্রাতৃপুত্রটির নাম সতীশ, রং টকটকে গৌরবর্ণ, একহারা চেহারা, নতুন স্প্রিং-এরমতো তার সমস্ত দেহের একটা দৃঢ়তা, বাঁধুনি ও স্থিতিস্থাপকতা ছিল। নতুন নতুন বদ্মায়েশি ফন্দি আঁটিবারবুদ্ধিতে ও সাহসে দলের সকলেই তার কাছে হার মানিত।

ফলে এই দলটির লেখাপড়া যাহা হইবার হইল, তারপরযখন শখের থিয়েটারের ধুম কলিকাতা হইতে কাশী গিয়াপৌঁছিল, এদের দল কাশীতে নব আন্দোলনের প্রতিভূ ওপ্রাণস্বরূপ হইয়া মহা উৎসাহে নিজেরাই বড় বড় কাগজে সিন্‌আকিয়া বেলের আঠা দিয়া জুড়িতে লাগিল, নিজেরাইস্টেজ বাঁধিল এবং ঘণ্টামার্কী সবেদার সাহায্যে রাজা, উজির সাজিয়া নাটকাভিনয় শুরু করিল।

বছর পাঁচেক পরে প্রেমচাঁদ মুখুয়ের লীলাপ্রাপ্তি ঘটিল, গণেশ-মহল্লার রামজীবনবাবুও গবর্নমেন্ট পেনশনের মায়া কাটাইলেন। তাঁর ছেলেরা পৈতৃক অর্থ ভাগ-বাঁটোয়ারাকরিয়া লইয়া ভায়ে ভায়ে পৃথক হইল। সতীশ নিরাশয় ওকপর্দকশূন্য অবস্থায় এখানে-ওখানে ঘুরিতে ঘুরিতে জুটিলগিয়া নেপালে।

নেপালে যে কি করিয়া সে দরবার হাসপাতালেকম্পাউন্ডারি পাইয়া চাকুরিতে ও চিকিৎসা ব্যবসায়েদু'পয়সা রোজগার করিতে লাগিল,—যে সতীশ ইংরাজিস্কুলের তৃতীয় শ্রেণির গণ্ডি দু'তিন বৎসরেও ডিঙাইতে পারে নাই, সে কি করিয়া দুরূহ ইংরাজিতে লেখা ডাক্তারি বই আয়ত্ত করিয়াছিল, সামান্য বেতনের কম্পাউন্ডার হইয়া সে কি ভাবে অবসর সময়ে রোগী দেখিয়া চিকিৎসা ব্যবসায়ে বেশ নাম করিয়া ফেলিয়াছিল—সে সব খবর দিতে পারিবনা।কিন্তু প্র্যাক্টিসে সে বাস্তবিকই সুনাম অর্জন করিল, বিশেষ করিয়া অস্ত্র-চিকিৎসায়। ভালো ও নিপুণঅস্ত্র-চিকিৎসকের যে যে গুণ থাকা দরকার—সার্ফ হাত, সার্ফ চোখ, সাহস, সতর্কতা, প্রকৃতিস্থতা, অবিচলিত বিচার-বুদ্ধি—এই সব গুণ তার ধীরে ধীরে বাড়িতেলাগিল—সঙ্গে সঙ্গে পসারও।

¹বাংলা ১২৮৭-৮৮ সালের কথা।

সতীশ নেপালে আসিয়া স্থানীয় স্কুলের জনৈক শিক্ষকেরকন্যাকে বিবাহ করিয়াছিল। শিক্ষকের নাম মৃত্যুঞ্জয়বাবু, বাড়ি নদীয়া জেলার মেহেরপুরে। পাঁচ বৎসর অন্তর বৃদ্ধপিতাকে দেখিতে একবার করিয়া দেশে যাইতেন। বিবাহেরদুই বৎসর পরে বাংলা ১৩০৭ সালে তাঁহাদেরই সঙ্গে সতীশ বাংলাদেশে অনেককাল পরে ফিরিয়া আসিল ও সর্বপ্রথম কলিকাতা শহর দেখিল। পৈতৃক বাসস্থান যে গ্রামে ছিল, সেখানেও একবার গেল। বাংলাদেশে আসিয়া সতীশেরমনে হইল যে, মায়ের মুখ সে ভালো মনে করিতে পারে না, ধোঁয়া ধোঁয়া অস্পষ্ট সামান্য একটু মনে পড়ে, যেন মেঘলাদিনের দিবানিদ্রার স্বপ্ন—সে-মায়ের স্নেহ সারা দেশটাতেছড়াইয়া পড়িয়া যেন সাগ্রহে তাহার প্রত্যাবর্তনের প্রতীক্ষায়পথ চাহিয়া বসিয়া আছে। গ্রামে আসিলে গ্রামের তো কেহতাহাকে চিনিতেই পারে না, কারণ সে গিয়াছিল নিতান্তছেলেবেলাতে দশ-বারো বছর বয়সে। পৈতৃক ভিটা খুঁজিয়াবাহির করিতে বেগ পাইতে হইল, কারণ এমন দুর্ভেদ্যবন-জঙ্গলে ঢাকিয়া পড়িয়াছে যে বাহির হইতে চিনিয়ালওয়াই কষ্টকর।

গ্রামের সকলেই আসিয়া ধরিয়া বসিল যে, তাহাকে দেশে ঘরবাড়ি করিতে হইবে—এখানে বাস করিতে হইবে। ইহার মধ্যে প্রতিবেশীর পুত্রের উপর নিছক নিঃস্বার্থ ভালোবাসা ছিল না, তাহা বলাই বাহুল্য। দেশে মোটেডাক্তার নাই, সতীশের মতো একজন নামজাদা ডাক্তারগ্রামে বসিয়া প্র্যাক্টিস করিলে গ্রামের লোকের সুবিধা বড়কম নহে—চক্ষুলজ্জার খাতিরে অন্তত গ্রামের লোকের কাছেসে তো আর ভিজিট লইতে পারিবে না !

সেবার সতীশ ভিটার মায়া কাটাইয়া ফিরিয়া গেল বটে, কিন্তু দেশের মায়া তাহাকে পাইয়া বসিয়াছিল— পরেরবৎসরই সে পুনরায় শীতকালে ছুটি লইয়া গ্রামে ফিরিয়াপৈতৃক ভিটার বনজঙ্গল কাটাইয়া সেখানে টিনের ঘরতুলিয়া ফেলিল। ছুটি ফুরাইলে আবার কর্মস্থলে ফিরিলসেবারও।

কিন্তু দেশের মায়া একবার পাইয়া বসিলে তাকে কিছাডানো সহজ ? চন্দ্রগিরি, উদয়গিরির দুর্গম গিরিসঙ্কট পারহইয়াও নদীয়া জেলার ক্ষুদ্র গ্রামের ডাক নেপালে গিয়া পৌঁছিয়াছিল। পর বৎসর সতীশ চাকুরিতে ইস্তফা দিয়াস্বী-পুত্রসহ দেশে আসিয়া বসিল ও গ্রামে প্র্যাক্টিস শুরুকরিল।

সে আজ বত্রিশ বছর পূর্বের কথা। তখনঅলিতে-গলিতে এম্.বি. পাশ ডাক্তার হয় নাই, আজকালকারের মতোপাশ-করা ডাক্তার খুঁজিয়া মেলানোদুর্ঘট ছিল। নিকটবর্তী নরহরিপুরের বাজারে তখন যাদুরাম স্যাকুরা ছিল দেশের মধ্যে বড় ডাক্তার।

যাদুরাম বাদে একজন মুসলমান হোমিওপ্যাথ, একজনকবিরাজও ছিল। ইঁহারা গেল প্রবীণের দলে। তরণের মধ্যে কানাইলাল রায় কলিকাতা হইতে কিসের একখানাসার্টিফিকেট আনিয়া ডাক্তার সাজিয়া বসিয়াছিল।

সতীশ আসিয়াই প্র্যাক্টিস জমাইয়া ফেলিল। সেউপরোক্ত হাতুড়ে দলের অনুকরণে নরহরিপুরের বাজারে ডাক্তারখানা খুলিয়া আধহাত লম্বা হরফে নিজের নামেরসাইনবোর্ড ঝুলাইল না বা রোগীর বাড়ি আসিয়া স্থানীয়অন্যান্য ডাক্তারদের নিন্দাবাদ করাও অভ্যাস করিল না।গ্রামের বাড়ির একখানা ঘরে ঔষধ রাখিত, আলাদাডিস্পেন্সারিও ছিল না—রোগীরা আসিয়া বসিত সতীশেরবাড়ির সামনে বটতলায়—তাহাদের বসিবার স্থানের পর্যন্ত কোনো ব্যবস্থা ছিল না।

কিন্তু এসব সত্ত্বেও সতীশের বাড়ির সামনের বটতলায়রোগীর ভিড় দিন দিন বাড়িয়া চলিল। দিনরাতে স্নানাহারেরসময় নাই, সাত-আট ক্রোশ দূরের গ্রাম হইতেও রোগীদেখিবার ডাক আসিতেছে, গরুর গাড়িতে রোগী দেখিয়াবেড়াইতে সতীশ হাঁপাইয়া পড়িল। প্রতিদিন সকালে নিজের বাড়িতে গড়ে তিন-চারটা সার্জিক্যাল কেস লাগিয়াই আছে।

ব্যাপার দেখিয়া যাদুরাম একদিন কানাই ডাক্তারকে ডাকিয়া বলিল, “এত রুগী এ-দেশে ছিল কোথায় এতদিন হে ?”

গত বিশ বৎসরের মধ্যে যাদু ডাক্তার এত রোগীর ভিড়কখনো দেখে নাই এ-অঞ্চলে।

বেগতিক বুঝিয়া কবিরাজটি একদিন জিনিসপত্র বাঁধিয়াঅন্যত্র সরিয়া পড়িল—কানাই দরজির দোকান খুলিবার জন্য সুবিধামতো দোকানঘরের সন্ধান করিতে লাগিল। যাদুস্যাক্রার অন্য কোনো উপায় ছিল না এ-বয়সে। আগেকারদু'পাঁচটা বাঁধা পুরানো ঘর ও পূর্ব-সঞ্চিত সামান্য কিছু টাকারজোরে কোনো রকমে টিকিয়া রহিল মাত্র !

সতীশের দুটি ছেলে ও ছোট একটি মেয়ে। মেয়েটিরহঠাৎ একদিন ভয়ানক জ্বর হইয়া পড়িল। নিজের বাড়িতেনিজে চিকিৎসা করা যায় না বলিয়া সতীশ যাদুরামস্যাক্রাকে ডাকাইল। যাদুরাম দেখিয়াই বিষণ্ণমুখে বলিল, তাই তো মুখ্যে মশায়, এ তো ভয়ানক রোগ, আপনিও বোঝেন, আমিও বুঝি, এ-রোগ তো এখানে সারবার নয়। এখন অন্য সবাইকে তফাত করুন, ছোঁয়াছুঁয়ি না হয়, ডিপথিরিয়া বড় সাংঘাতিক ব্যাপার কিনা !

যাদুরাম প্রাণপণে ক'দিন দেখিল, কিছুই করা গেল না। তৃতীয় দিনে মেয়েটি মারা পড়িল।

এই ব্যাপারের পর হইতে সতীশের স্ত্রীর সামান্য মস্তিষ্ক-বিকৃতি ঘটিল—আপনমনে বকুনি, ইহাই দাঁড়াইল উপসর্গ। নয়তো অন্য সবদিকে কোনো অপ্রকৃতিস্থতার চিহ্নও নাই, সংসারের কাজ-কর্ম, স্বামী-পুত্রের যত্ন—কিছুরই মধ্যেকোনো ত্রুটি নাই।

সতীশ বড় দমিয়া গেল। হাতে পয়সার জোর ছিল, কিছুদিন প্র্যাক্টিস বন্ধ রাখিয়া এখানে-ওখানে ঘুরাইয়াআনিল সকলকে, পূর্ববঙ্গে শ্বশুরবাড়ি গিয়া রহিল কিছুদিন, কলিকাতায় আসিয়া ডাক্তার-কবিরাজ দেখাইল, তখনকারমতো উপশম না হইল যে এমন নয়। কিন্তু দেশে আসিয়াই 'যথা পূর্বং তথা পরং'।

বড় ছেলেটির বয়স বারো, সে তিন ক্রোশ দূরবর্তী রাসনগরের হাই স্কুলের বোর্ডিং-এ থাকিয়া পড়াশুনা করিতেছিল। ছোট ছেলেটিকেও এবার সতীশ সেখানেরাখিয়া দিল।

এ-সব বাংলা ১৩১২ সালের কথা।

তারপর যেমন অন্য পাঁচজন মানুষের দিন যায়, সতীশেরদিনও তেমনি ভাবে যাইতে লাগিল।

রোগী দেখা, টাকা রোজগার, সংসার প্রতিপালন।

ছেলেরা বড় হইল। বড় ছেলেটির নাম বিনয়, সেআই.এসসি. পাশ করিয়া মেডিকেল কলেজে ডাক্তারিপড়িতে লাগিল। সতীশ পুত্রবধূর মুখ দেখিবার জন্য এইসময় তাহার বিবাহও দিল। ছোট ছেলে তখনো স্কুলেরছাত্র, সে তার দাদার চেয়েও মেধাবী এবং সুবুদ্ধি। ইতিমধ্যোনাস্থান হইতে তাহার বিবাহের সম্বন্ধ যাতায়াতকরিতেছিল।

এ সব গেল বাহিরের ব্যাপার। সতীশের মনের বড়অদ্ভুত পরিবর্তন হইতে লাগিল ধীরে ধীরে। পনের-ষোলো বৎসর ধরিয়া সে এই গ্রামে এবং পার্শ্ববর্তী অঞ্চলে ডাক্তারিকরিতেছে—এই পনেরো-ষোলো বৎসরের জীবনে নিতান্তএকঘেয়ে—রোগী দেখা, খাওয়া, ঘুমানো, ভূষণ দাঁ-এরদোকানে বসিয়া মাঝে মাঝে গল্প-গুজব, সংসারের বাজার-হাট করানোর ব্যবস্থা করা—দিনের পর দিন, মাসেরপর মাস, বৎসরের পর বৎসর—একঘেয়ে, এক রকমজীবনধারা, বৈচিত্র্য নাই, পরিবর্তন নাই, নতুনতর অনুভূতিরকোনো আসিবার পথ নাই, কোনো দিক্ দিয়া। কিন্তু সতীশএ বিষয়ে খুব সচেতন নয় জীবনে তেমন আর আনন্দ নাই, এ কথা এক-আধবার তাহার মনে যে না উঠিয়াছে এমননয়—কিন্তু এ লইয়া ভাবিতে সে বসে নাই কখনো, ভবিবার সময়ও পায় নাই।

কিন্তু ক্রমে এ কথাটা তাহার মনের মধ্যে উঁকি মারিতেলাগিল। হয়তো নিস্তর দুপুরে বিলের পাশের পথ দিয়াগরুর গাড়িতে আরামে সে ভিন্ণায়ে রোগী দেখিতেচলিয়াছে। মাঠের ধারে ধারে ঘুঘুপাখির ডাকে কিংবাবিলের গভীর জলে বাগদি ছেলের ডোঙা চড়িয়া মাছধরিবার দৃশ্য—সে দেখিত সে হঠাৎ অন্যমনস্ক হইয়া কাশীতে যাপিত বাল্যজীবনের কথা ভাবিতেছে—রামরাম সাহু হালুইকরের দোকানে লছমী বলিয়া সেই মেয়েটি থাকিত—এতকাল পরেও তার সে

গলার সুমিষ্ট সুর যেনপ্রাণে লাগিয়া আছে... একবার সে, রামজীবনবাবুর বড়ছেলে বাদল, তার ভাগ্নে নরু—তিনজনে জঙ্গমবাড়িরবারোয়ারি আসরে সিদ্ধি খাইয়া কি কাণ্ডটাই করিয়াছিল !...

নেপালে একবার কর্নেল খড়গ সম্ভের জঙ্গ রাণা বাহাদুরের কন্যার বিবাহেতে নিমন্ত্রিত হইয়া গিয়াছিল। গিয়া দেখিল খাওয়া-দাওয়ার ব্যবস্থা নাই—একটা মোড়কের মধ্যে মশলা ও সুপারি আর একটা মোড়কে পাঁচটি টাকা। সতীশ কর্নেল বাহাদুরের দেওয়ানকে বলিল—টাকা কিসের ? নিমন্ত্রিত হয়ে এসে টাকা নেওয়া আমরা অপমানজনক মনে করি।

দেওয়ান বলিল—এখানে এই নিয়ম। না নিলে কর্নেল চটতে পারেন।

সতীশ রাগ করিয়া বলিল—চটে আমার কি করবেনতিনি ? চাকরি নেবেন ? নিন—আমি এখন ইন্তফা দিতেরাজী আছি, টাকা কখনই নিতে পারব না।

গোলমাল শুনিয়া রাণা বাহাদুর নিজে আসিয়া ব্যাপারটা অন্যভাবে মিটাইয়া দিলেন। চাকুরি যাওয়া তো দূরের কথা, সেই মাসেই সতীশের দশ টাকা বেতন বৃদ্ধি হইয়াছিল।...

গত পনেরো বৎসর ধরিয়া সতীশ তো অনবরত সকলের কাছেই কাশী আর নেপালের গল্প করিয়া আসিতেছে। তাহারসমবয়সী লোকদের কাছে, দেশের বন্ধুদের কাছে, রোগী ও রোগীদের আত্মীয়-স্বজনের কাছে—কিন্তু সে শুধু বাহাদুরিলইবার জন্য, সে কত দেশ বেড়াইয়া কত অভিজ্ঞতা সঞ্চয় করিয়াছে, কত বড়মানুষি করিয়াছে, কত বড় বড় লোকেরসমাজে মিশিয়াছে—তাহা সাড়ম্বরে জাহির করিবার জন্য। এবার কিন্তু এ সব জীবনের স্মৃতি একটা অস্পষ্ট বেদনার মতো তাহার মনে আসিয়া উদয় হইতে লাগিল—কি যেন একটা জিনিস চিরকালের জন্য হারাইয়া গিয়াছে, আরকোনো দিন তাহার সাক্ষাৎ মিলিবে না, সতীশের এই এত বড় পসারের বিনিময়েও না, সঞ্চিত অর্থের বিনিময়েও না, কোনো কিছুতেই না।

এ গ্রামের জীবনও ক্রমে নিরানন্দ হইয়া উঠিতে লাগিল। সতীশ গ্রামে আসিয়া ও গ্রামে যে কয়টি সুখের সুখী, দুঃখেরদুঃখী প্রবীণ আত্মীয়-স্থানীয় লোক পাইয়াছিল, এ পাড়ারঅধিকা রায়, শ্যামাকান্ত গাঙ্গুলী ও পাড়ার বৃদ্ধ গোসাঁই মশায়—এঁরা একে একে মারা গেলেন।

আষাঢ় মাসের শেষে যাদুরাম স্যাকরার রোগশয্যা-পার্শ্বেসতীশের ডাক পড়িল।

যাদুরামের বয়স হইয়াছিল প্রায় পঁচাত্তর বৎসরেরকাছাকাছি, গত দশ বৎসর অর্থাভাব ও দারিদ্র্যের সঙ্গে যুদ্ধকরিয়া যাদুরামের স্বাস্থ্য একেবারে ভাঙিয়া পড়িয়াছিল। সতীশ বুঝিল এই বয়সে, তার উপর ডবল নিউমোনিয়া রোগ, যাদুরামও বিছানা ছাড়িয়া আর উঠিবে না। যাদুরাম নিজেও সেটা খুব ভালো করিয়াই বুঝিয়াছিল—ক্ষীণ কণ্ঠেবলিল, মুখুয্যে মশায়, ওষুধ আর কি দেবেন, পায়ের ধুলোদিন। একটা কথা বলি, নাতিটার উপায় করতে পারলাম না, দু-দুটো ছেলে মারা গেল—ওইটুকুবৎশের মধ্যে শিবরাত্রিরসন্মতে,ওকে আপনার চরণে দিয়ে গেলাম। কম্পাউন্ডারিতে ভর্তি করে নেবেন আপনার ডাক্তারখানায়—বছর তিনেকদেখেগুনে শিখলে তবুও অন্য চাষা-গাঁয়ে গিয়ে হাতুড়েগিরিকরেও দুটো খেতে পারবে।

সতীশের চোখ জলে ভরিয়া আসিল ভগ্নহৃদয় বৃদ্ধচিকিৎসকের অন্তিম শয্যা-পার্শ্বে বসিয়া। সে আশ্বাস দিল, এ বিষয়ে তাহার দ্বারা যতদূর সাধ্য সে করিতে ক্রটি করিবেনা। যাদুরাম এমন পয়সা রাখিয়া যায় নাই, যাহাতে তাহারশ্রাদ্ধের খরচ নির্বাহ হইতে পারে—সতীশ নিজে শ্রাদ্ধ-সংক্রান্ত যাবতীয় ব্যয়ভার বহন করিল। নাতিকেনিজের ডাক্তারখানায় আনিয়া কাজ শিখাইতে লাগিল, খুচরা কিছু দেনা ছিল বৃদ্ধের, তাহারও একরূপ সাময়িকমীমাংসা করিয়া দিল।

এই সময় সতীশের নিজের সময়েরও পরিবর্তন দেখাদিল। ছোট ছেলের কলেজের খরচ, বড় ছেলের ডাক্তারি পড়ার খরচ—এদিকে কি জানি কেন রোগীর সংখ্যাকমিতেছে। স্থানটা কি হঠাৎ স্বাস্থ্যনিবাস হইয়া উঠিল নাকি? সঞ্চিত অর্থ ক্রমশ হাত পড়িতে লাগিল—এবং সাধারণতযাহা ঘটিয়া থাকে, একবার সঞ্চিত অর্থ হাত যখন

পড়িল, সে হাতকে আর গুটানো গেল না—বৎসরের পর বৎসরক্রমশ খরচ বাড়িয়াই চলিয়াছে—আয় তেমন নাই, হাতের টাকানিঃশেষ হইতে এ অবস্থায় কত দিন লাগে ?

সতীশ অমানুষিক পরিশ্রম করিতে লাগিল। আর দুটোবছর, বিনয় মানুষ হইলে আর কিসের ভাবনা ? এ অঞ্চলে এম.বি. পাশ করা ডাক্তার কটা আছে ? কখনো যেসব গ্রামে দশ টাকা ভিজিটের কমে সতীশ যায় নাই—এখন চার টাকালইয়াও সেখানে যাইতে হইতেছে। নিজে দুধ খাওয়াছাড়িয়া দিল—বাড়ির চাকরকে জবাব দিল। খরচ কম পড়িবে বলিয়া স্ত্রী ও পুত্রবধূকে কলিকাতায় পাঠাইয়া ছেলেদের বাসাকরিয়া দিল—নিজে দেশে হাত পুড়াইয়া রাঁধিয়া খাইয়া এবং সারাদিন টো টো করিয়া গ্রামে গ্রামে রোগী দেখিয়া যাহাপায়, প্রতি সপ্তাহে কলিকাতার বাসাতে বিনয়ের নামে মনিঅর্ডার করে।

বিনয় এম.বি. পাশ করিয়া যুদ্ধে গেল।

সতীশের দুঃখ ঘুচিল এতদিনে।

গ্রামের মধ্যেও একটা সাড়া পড়িল না এমন নয়। এঅঞ্চলে এম.বি. পাশ করা ডাক্তার এই প্রথম। তাহার উপরবিনয় আবার গবর্নমেন্টের চাকরি পাইয়া সুদূরমেসোপটেমিয়ায় গিয়াছে। সেদিন নাকি ছোটখাটো একটিখণ্ডযুদ্ধে আরবদের গুলি বিনয়ের কানের পাশ কাটাইয়াবাহির হইয়া গিয়াছে, পয়সা কি এমনি হয় ? বিনয় পত্রে এই ঘটনাটি বাবাকে জানাইয়াছিল। নরহরিপুরের বাজারে ভূষণ দাঁ-এর পুরানো আড্ডাটা আর ছিল না— কারণ পনেরোবৎসর হইল ভূষণ মরিয়া গিয়াছে। তবুও এ দোকানে, ওদোকানে বসিয়া সতীশ গর্বের সঙ্গে পুত্রের চিঠি হইতেযতটুকু সে-দেশের খবর পায়, তারই সাহায্যে যুদ্ধের গল্পকরে।

সঙ্গে সঙ্গে বলে—কিন্তু আমাদের নেপালে যখনপ্রাইম-মিনিস্টারের বাড়ির সামনের ময়দানে প্যারেড হত, তাতে আমরা যুদ্ধের কৌশল সবই দেখেছি। মেশিনগান? ও তো আমাদের সময়েই প্রথমে নেপালে এল... আমাদেরকাছে ওসব নতুন নয়—

অর্থাৎ নেপাল ও সতীশের যৌবন—ইহারা কাহারওকাছে পরাজয় স্বীকার করিবে না। সব ছিল নেপালে। দু'চারবার মোটা টাকার মনিঅর্ডার পাইয়া সতীশ মহাউৎসাহে বাড়ি নতুন করিয়া তৈরি করিবার জন্য মিস্ত্রি লাগাইল। ছেলে বড় ডাক্তার হইয়া ফিরিয়া আসিতেছে, সাহেবি মেজাজ এখন তার—এ ধরনের বে-মেরামতিপুরানো বাড়িতে থাকিতে তাহার কষ্ট হইবে। সতীশ ছেলের উপযুক্ত মতো বাড়ির পুনরায় সংস্কার করিতে অনেক ব্যয় করিয়া ফেলিল। এইখানে ডাক্তারখানা হইবে, এইটিছেলের বসিবার ঘর, এইটি নাতিদের পড়িবার ঘর।

হঠাৎ মেসোপটেমিয়া হইতে বিনয়ের পত্র আসা বন্ধহইয়া গেল। দু'দশ দিন করিয়া মাসখানেক কোনো খবরনাই—সতীশ অত্যন্ত ধৈর্যশীল, সে নিজে অটল থাকিয়া স্ত্রী ও পুত্রবধূকে নানা মিথ্যা স্তোকবাক্যে ভুলাইয়া রাখিবারচেষ্টা করে, ক্রমে গ্রামময় গুজব রটিয়া গেল বিনয় আরনাই, যুদ্ধে মারা পড়িয়াছে।

বিনয়কে গ্রামের সকলেই ভালোবাসিত, তাহার সুন্দরচেহারা ও মধুর ব্যবহারের গুণে বিনয়কে কেহ পর ভাবিতনা। এ দুঃসংবাদে চোখের জল ফেলিল না, এমন লোক নাইগ্রামে। সতীশের সহ্য করিবার শক্তি দেখিয়া সকলে অবাকহইয়া গেল, তাহার মুখে একদিন কেহ কোনো দুর্বল কথাশুনিল না—চোখে জল দেখা তো দূরের কথা।

জ্যৈষ্ঠ মাস। ভীষণ গরম। মুখ্যে-বাড়ির তেঁতুলতলারসামনে একখানা ভাঙা গরুর গাড়ির উপর বসিয়া পাড়ারনিষ্কর্মা যুবকেরা আড্ডা দিতেছে—এমন সময়ে সাইকেলেমোড়ের মাথায় সাহেবি-পোশাকে কাহাকে আসিতে দেখা গেল। বিনয় !

মুখুয়ে-গিল্লি স্নানান্তে শিবপূজা করিতে বসিয়াছিলেন, পূজা ফেলিয়া ছুটিতে ছুটিতে পথের ধারে আসিলেন অর্থাৎতাহার পায়ের বাতের দরুন যতটুকু ছোট তঁর পক্ষে সম্ভব হয় ততটুকু বেগে, বিনয়কে বুকের মধ্যে জড়াইয়া কাঁদিয়াফেলিলেন, যুবকেরা সকলে বলিল, আচ্ছা ভয়দেখিয়েছিলেন বিনয়দা, বেশ যা হোক—

বিদ্যুৎবেগে গ্রামের সর্বত্র বিনয়ের প্রত্যাবর্তনের সংবাদপ্রচারিত হইবার সঙ্গে সঙ্গে সতীশ ডাক্তারের বাড়ির উঠানেসব পাড়ার লোক ভাঙিয়া পড়িল। বিভিন্ন পাড়ায় সেদিনসন্ধ্যায় গ্রামের মেয়েরা হরিগ্লুট দিল।

বিনয় যুদ্ধ হইতে আসিয়া প্রথম প্রথম গ্রামেইবসিয়াছিল—তারপরে সে মহকুমায় গিয়া বসিয়াছে। এতপসার এ অঞ্চলে কোনো ডাক্তারের কেহ কখনো দেখেনাই।

সতীশও ডাক্তারি করিত স্বগ্রামেই কিন্তু ছেলে আসিবারসঙ্গে সঙ্গে তাহার পসার কমিয়া গেল, সবাই বিনয়কে চায়, সতীশকে কেহ বড় একটা ডাকে না। সে সকলকে গর্বেরসঙ্গে বলে, তা তো হবেই, বিনয় এসেছেন। অত বড় ডাক্তার, আমরা তো সেকলে কোয়াক, ওঁদের কাছে কিআমরা—

পরাজয়েরও সুখ আছে, গর্বআছে।

সতীশ একদিন হঠাৎ আবিষ্কার করিয়া ফেলিল, সেবৃদ্ধের দলে পড়িয়া গিয়াছে। গণেশমহল্লার সে ডানপিটে সতীশ—ঠাসা বন্দুকের এক দ্যাওড়ে অসিঘাটের ওপরেরচরে যে তিনটা পাখি মারিয়াছিল মনে আছে, বুঢ়া-মঙ্গলেরসময় আলোকিত বজরার পাশ দিয়ে ডুবসাঁতার দিতে দিতেকাহাদের আলোকোজ্জ্বল বাজরা—

যাক, সে সব পুরানো কাসুন্দি ঘাঁটিয়া লাভ কি ?মোটের উপর সতীশকে সবাই এখন ‘বুড়োকর্তা’ বলিতে শুরু করিয়াছে, এটা সে লক্ষ করিল; বিশেষত বিনয় ফিরিয়া আসিবার পর হইতে।

নাতিরা স্কুলে পড়ে। সতীশের ছোট ছেলে কিন্তু ভালোহইল না। সে কলেজ ছাড়িয়া দিয়া এতদিন বাড়িতেই বসিয়াছিল—এইবার দাদার ডাক্তারখানায় কম্পাউন্ডারি আরম্ভকরিল।

জলের স্রোতের মতো বৎসর কাটিয়া যাইতেছে।দেখিতে দেখিতে বিনয়ের প্রত্যাবর্তনের পর সাত বৎসর কাটিল।

এই সাত বৎসরের অনেক পরিবর্তন ঘটিয়া গেলসতীশের জগতে ! বিনয় কুসঙ্গে পড়িয়া ঘোর মাতাল হইয়াউঠিয়াছে—পয়সা যথেষ্ট রোজগার করে কিন্তু হাতেরাখিতে পারে না। কাহাকেও মানে না। যুদ্ধে গিয়াই সে মদ খাইতে শিখিয়াছিল। আগে বাপকে ভয় করিত, লোকলজ্জার ভয় রাখিত। এখন বয়স বাড়িবার সঙ্গে সঙ্গেবাপকে আর তেমন মানে না।

সতীশ স্ব-গ্রামেই থাকিত। প্রথম প্রথম পুত্রবধূরা গ্রামের বাড়িতেই থাকিত। ক্রমে তাহারা চলিয়া গেল বিনয়েরবাসায়। সতীশের স্ত্রীর সেই উন্মাদ রোগ একেবারে কখনোসারে নাই, এই সময় বেশি করিয়া দেখা দিল। সেই জন্যইমাকে বিনয় দেশের বাড়িতে রাখিয়াছিল। তবু এতদিন সর্বদাদেখাশুনা করিত, শুশ্রূষা ও চিকিৎসার ক্রটি কখনো করেনাই।

ক্রমে ক্রমে কিন্তু মাকেও সে অবহেলা করিতে লাগিল।এক মাসেও একবার মাকে দেখিতে আসে না, অথচ সেমোটর কিনিয়াছে। এই নমাইল পথ আসিতে কতক্ষণলাগে ?

শুধু পানদোষ নয়, আনুষঙ্গিক অনেক উপসর্গই জুটিয়াছেবিনয়ের। স্ত্রী-পুত্রকেও যন্ত্রণা দেয়, সংসারের ন্যায্য খরচের টাকা রাতে কোথায় গিয়া ব্যয় করিয়া আসে, কেহ জানে না।প্রায়ই সারারাত্রি বাহিরে কাটায়। মাঝে মাঝে দিনমানেওডাক্তারখানায় বসে না। পসার কমিতে লাগিল, রোগীরাআসিয়া ফিরিয়া যায়। বৃদ্ধ বয়েসে সতীশ ঘোর অর্থকষ্টে পড়িল। বিনয় বাপ-মাকে মাঝে মাঝে টাকা যে না দেয় এমননয়, কিন্তু তাহাতে সতীশের চলে না। ছোট ছেলেটি দাদারঅবস্থা দেখিয়া নিজের স্ত্রী পুত্র লইয়া শ্বশুরবাড়ি চলিয়াগেল, সে-ও বাপ-মায়ের কোনো সংবাদ লয় না।

সন্ধ্যাবেলা বসিয়া বসিয়া তামাক খাইতে খাইতে সতীশঅন্যমনস্ক ভাবেই এই সব কথাই ভাবিতেছিল, এমন সময়েউঠোনে কাহাকে আসিতে দেখা গেল।

—কে?

—আমি পটল, দাদা।

সতীশ খুশি হইয়া একগাল হাসিয়া হুঁকা হাতে উঠিয়াদাঁড়াইল।

—আয় পটল ! আয়, আয়—

পটল বিনয়ের বড় ছেলে দিব্যেন্দুর ডাকনাম। গৌরবর্ণ, সুশ্রী, চোদ্দ-পনেরো বছরের হাস্যমুখ বালক। নাতিদের জন্য বৃদ্ধের মন-কেমন করে সর্বদা—কিন্তু তাহারা বড় একটা এদিকে পা দেয় না। অপ্রত্যাশিতভাবে নাतिकে দেখিয়াসতীশ যেন আকাশের চাঁদ হাতে পাইল।

—তোর বাবার খবর কিরে, পটল ?দিব্যেন্দু অপরাধীর মতো দৃষ্টিতে চাহিয়া বলিল—সেই একই রকম দাদা। বরং আরো বেড়েছে। পরে সে দাগ দেখাইল, মাতাল অবস্থায় বাবা কি একটা শক্ত অ্যালজেরার অঙ্ক কষিতে দিয়াছিল, সে পারে নাই বলিয়া ছড়ি দিয়ামারিয়াছে। দু'জনে বসিয়া অনেক কথা হইল। সতীশবলিল—বোস্পটল, রাঁধি গে গিয়ে, খাবি কি নইলে ?

সতীশের স্ত্রী এখন সম্পূর্ণ পাগল, একটা ঘরে একাদিনরাত শুইয়া থাকে, আপনমনে বিড় বিড় করিয়া বকে, কাজকর্ম করা দূরের কথা, না খাওয়াইয়া দিলে খায় না।সতীশ বলিল—এক একবার মনে হয় পটল, আবারপ্র্যাকটিস শুরু করি। কিন্তু এখন আর কেউ আমায় ডাকবে না। ত্রিশ বছর আগে যখন এসেছিলাম এ দেশে, তখনতেমন ডাক্তার ছিল না। এখন নরহরিপুরের বাজারেইতিনটে ক্যাম্বেল পাশ, একটা এম.বি.। ওদিকে তো বিনয়রয়েচে, শ্যামবাবু—সবাই এম.বি.। আমাকে আর কেডাকবে?

দিব্যেন্দু বলে—ভেবো না দাদা। আমি পাশ করে যখনচাকরি করব, তখন তোমার আর এ দশা থাকবে না।

সতীশ উৎসাহের সহিত বলে—আমায় কাশী পাঠিয়েদিস, পটল। কতকাল দেখি নি—এই শুন্বি তবে আমরা কিকরতাম সেখানে ?

দিব্যেন্দু জ্ঞান হইয়া পর্যন্ত কাশীর গল্প, নেপালের গল্পঅনেক শুনিয়াছে ঠাকুরদাদার মুখে। একই গল্প পঞ্চাশবারসে শুনিয়াছে অন্তত। মুখস্থ বলিতে পারে। তবুও বৃদ্ধঠাকুরদাদাকে খুশি করিবার জন্য বলিল—বলো না, দাদা !চন্দ্রগিরি পার হবার সময় সেবার নেপালের পথে সেই কিহয়েছিল ?

দিব্যেন্দু কখনো নেপাল দেখে নাই, কিন্তু ঠাকুরদাদারমুখে আজন্ম বর্ণনা শুনিয়া চন্দ্রগিরি, রত্নগিরি, রকসৌলেরপশুপতিনাথ-মেলার দৃশ্য—এসব তাহার মানসপটে সুস্পষ্টরেখা ও বর্ণে রূপ গ্রহণ করিয়াছিল। চোখ বুজিলেই এ সবযেন সে দেখিতে পায়।

সকালে উঠিয়া দিব্যেন্দু চলিয়া গেল।

সতীশ বলিল—তোর বাবাকে বলিস্দি কি পটল, জুতোএই দ্যাখ, একেবারে নেই—স্যাম্বেলটা সেই তোর বাবারদরুন সেবার বাসা থেকে এনেছিলাম, তা ছিঁড়ে গিয়েছে।

দিব্যেন্দু যাবার সময় বলিয়া গেল—এ-সব কথা আমিবলেচি, বোলো না যেন বাবাকে, দাদা। তা হলে বাবাপিঠের ছাল তুলবে আমার—

দিব্যেন্দু চলিয়া গেলে বৃদ্ধ আবার পুরাতন দিনগুলিরস্বপ্ন দেখিতে থাকে। আজকাল হাতে কাজকর্ম একেবারেইনাই—এ ধরনের অলস জীবন সে যাপন করে নাইকখনো—আপনমনে বসিলেই সেই সব কথা মনে আসে।

গাঙ্গুলী-বাড়ির আন্না কালী দুটি কচি শসা হাতে পৈঠাতে উঠিয়া বলিল—গাছে হয়েছিল জ্যাঠাবাবু, মা বললে দিয়েআয়।

আঁচলের মুড়োয় বাঁধা কি একটা জিনিস খুলিতে খুলিতে বলিল—আর এই ক'টা—

সতীশের মনের নিরানন্দ ভাব অন্তর্হিত হইয়া গেল। আগ্রহ-উজ্জ্বল চোখে আন্না কালীর আঁচলে বাঁধা দ্রব্যের দিকে চাহিয়া বলিল—কি রে ওতে ? মটরডালের বড়ি ! বাঃ বাঃ—দে, রাখ এখানে মা।

সতীশ চিরকাল খাইতে ও খাওয়াইতে ভালোবাসে। আজকাল অভাবে পড়িয়া গিয়াছে, অমন উপার্জনক্ষম ছেলে থাকিতেও নাই—তাই গ্রামের মেয়েরা ভালো জিনিসটা বাড়িতে হইলে সতীশকে মাঝে মাঝে পাঠাইয়া দেয়।

আন্না কালী চোদ্দ-পনেরো বছরের সুন্দরী মেয়ে—উপরিউপরি চারটি কন্যার জন্মগ্রহণের পরে বাপ-মা পঞ্চম ও সর্বকনিষ্ঠ কন্যাটির ওই নাম রাখিয়াছিল, নামের সঙ্গে তার চেহারার কোনো সম্পর্ক নাই। সে হাসিয়া বলিল—আপনার হাতের সেই কলায়ের ডাল রান্না কখনো ভুলব না জ্যাঠাবাবু। মেয়েমানুষে অমন রাঁধতে পারে না।

সতীশ খুশি হইয়া উজ্জ্বল মুখে বলিল—কবে খেলি রে, আন্না ?

আন্না কালী ঘাড় দুলাইয়া বলিল—বা রে, এই তো ভাদ্রমাসে অরন্ধনের দিন ? তারপর ঘরের দিকে চাহিয়া বলিল—জ্যাঠাইমা কেমন ?

—ওই এক রকম, ওর আবার ভালো আর মন্দ। ওরই জন্যে তো কোথাও যেতে পারি নে আন্না। নইলে কাশীতে গেলে একটা পেট চলে যায়। আর কাশীময় আমার বন্ধুবান্ধব, তা ওর অযত্ন হবে, ওকে দেখবে শুনবে কে, সেই জন্যই তো আছি আটকে। নইলে আমার আবার ভাবনা ? এই শুনবি, কাশীতে আমরা কি করতাম ?

তারপর কাশীর গল্প আরম্ভ হয়। আন্নাও এসব গল্পইতিপূর্বে শুনিয়াছে, কিন্তু গল্প শুনিতে সে ভালোবাসে, বিশেষ করিয়া জ্যাঠামহাশয়ের মুখে। সে রোয়াকের পৈঠার উপর বসিয়া পড়ে। কাশীর কথা হইতে কখন নেপালের কথা আসিয়া পড়িয়াছে দু'জনের কেহই লক্ষ্য করে নাই, হঠাৎ আন্না উঠানের দিকে ভীত চোখে চাহিয়া বলিল—জ্যাঠাইমাকোথায় বেরিয়ে যাচ্ছে যে !...

—ধর, ধর, মা ধর—নিয়ে আয়। নাঃ, জ্বালালে বাপু।

আন্না দৌড়িয়া উঠিয়া গিয়া শীর্ণদেহ, রুক্ষকেশ, বকুনি-রত জ্যাঠাইমার হাতখানা খপ্প করিয়া ধরিয়া ফেলিয়া বলিল—এসো জ্যাঠাইমা, কোথায় যাচ্ছ, এসো...

—একেবারে ঘরের মধ্যে নিয়ে যা, মা। নাঃ, আমার হয়েছে যত বিপদ; তা ইয়ে আন্না, কলায়ের ডাল রাঁধব এখন মা, আজ দুপুরে আমার এখানে দুটো খাস্ এখন।

পরের বছর হইতে বিনয়ের পসার একেবারেই কমিয়া গেল। দশ-বারো বছর আগের ব্যাপার আর ছিল না, এখন এক মহকুমা-টাউনের উপর তিনজন এম.বি.। পানদোষ ও উচ্ছৃঙ্খলতার জন্য ভদ্র-গৃহস্থের বাড়িতে তাহাকে কেহ আজকাল ডাকে না, তা ছাড়া রোগীরা আসিয়াও ডাক্তারের দেখা পায় না।

তাহার পর দেখা দিল পৃথিবীব্যাপী মন্দা। পাটের বাজার একেবারে পড়িয়া গেল। রোগ হইলেও আর লোকে ডাক্তার দেখাইতে পারে না। বিনয় মহা অর্থ-কষ্টের মধ্যে পড়িল। সে লোক খারাপ নয়, হাতে পয়সা থাকিলে যতক্ষণ খরচ করিতে না পারে, ততক্ষণ তাহার মনে শান্তি হয় না, উদার দিলদরিয়া মেজাজের মানুষ। বাবাকে সে ইচ্ছা করিয়া যে অবহেলা করে তা নয়, বাবা এত ঘনিষ্ঠ, এত সুপরিচিত যে তাহার সম্বন্ধে সে কোনো খেয়ালই করে না। সতীশ মুখফুটিয়া কখনো ছেলেকে জানায়ও নাই তাহার অসচ্ছলতার কথা, পাছে ছেলেকে বিরত হইতে হয়।

এই অবস্থায় একদিন বিনয় পিতার সহিত দেখা করিতে আসিল। সতীশ অপ্রত্যাশিত ভাবে ছেলেকে দেখিয়ামহাব্যস্ত হইয়া উঠিল। সারা বাড়ির মধ্যে একখানা চেয়ারকি টুল পর্যন্ত নাই, ছেলেকে বসিতে দেয় কিসে যে!

বিনয় বলিল—থাকবাবা, থাক্, আমি এই যে বেশবসেছি।

সতীশ ব্যস্তসুরে বলিল...উঃ, ঘেমে একেবারে..দাঁড়াওএকটু চা করে আনি। ভাড়াটে মোটরে এলে কেন ?তোমার গাড়ি কোথায় ?

গাড়ি আছে, ইঞ্জিন খারাপ হয়ে গেছে, মেরামতের জন্য একমুঠো টাকা দরকার, হাতে পয়সা কোথায় ?কাজেইগাড়ি গ্যারেজে পড়ে।

—পটল কোথায় ?

—কলকাতাতেই আছে। ওর পড়াশুনার যে কি করি ?মেসে তো একগাদা টাকা খরচ, তিনমাসের মেসের দেনাবাকি। কলেজের মাইনেও দু'মাস পাঠাতে পারিনি।

পিতা-পুত্রে অনেকক্ষণ পরামর্শ হইল। তিন জায়গার খরচ বিনয় তো আর পারে না। দেশের বাড়ি, টাউনের বাসাএবং দিব্যেন্দুর মেস ও কলেজের খরচ। কি এখন করা যায় ?

বিশেষ কিছুই মীমাংসা হইল না। উঠবার সময় বিনয়কুণ্ঠিত ভাবে বাবাকে দুটি টাকা দিতে গেল। ছেলের শুষ্ক ওচিন্তাকুল মুখ দেখিয়া বৃদ্ধ টাকা দুটি প্রাণ ধরিয় লইতেপারিল না। বলিল—রেখে দাও এখন, সোমবার দস্তিঘাটাথেকে ডাক এসেছিল। কিছু পেয়েচি, তোমার মোটরেরভাড়াও তো লাগবে আবার ?

গ্রামের একটি ছেলে রেলের কাজ করিত, ছুটি লইয়া দেশে আসিয়া প্রায়ই সন্ধ্যাবেলা সতীশের কাছে গল্প করিতেআসিত। একদিন সতীশবলিল—দ্যাখো উমাপদ, ভাবচি কি জানো ?তোমার জ্যাঠাইমাকে ওর বাপের বাড়িতে রেখে আমি কাশী চলে যাই। একজন লোকের কাশীতে বেশ চলবে। নইলে এদিকে সবই তো শুনলে—বিনয় বড় মুশকিলে পড়েচে, রুগি-পত্তর নেই, ডাক নেই, এই বাজারে দুটো সংসার চালানো কি সোজা কথা রে, বাবা ?আমরা চলে গেলে, ও তবু খানিকটা খোলসা হয়...তাছাড়া কাশীতেআমার বন্ধু-বান্ধব ভর্তি, আহা কত কাণ্ডই করেচি সব একসময়, কাশীতে কাকে না চিনি ?

উমাপদ আবাল্য এসব গল্পের সঙ্গে পরিচিত, সে বলিল—পাগল হয়েচেন ?আপনার ছেলেবেলার আমলেরতারা কি আর কেউ এখন আছে ভাবচেন?সে সব কি...

সতীশ কথাটা পছন্দ করিল না, বাধা দিয়া বলিল—তুমিকি করে জানলে নেই ?আমাদের সে ডানপিটে দলের ছেলে হঠাৎ মরবার নয় জেনো ('ছেলে' কথাটা অসতর্ক মুহূর্তেমুখ দিয়া বাহির হইয়া গেল)—সব আছে, হেঁ-হেঁ হঠাৎ আমরা মরচি নে। তুমি জানো না, আমাদের সে দলেরকথা—শুনবে তবে ?

উমাপদ ব্যস্ত হইয়া বলিল—ইয়ে, জ্যাঠামশায় আরএকদিন বরং এসে—আজ একটু কাজ আছে—উঠি এখন।

দিন পনেরো পরে সতীশ একদিন কাশী স্টেশনেদুপুরবেলা নামিল। স্ত্রীকে মেহেরপুরে ছোট শালার কাছে রাখিয়া আসিয়াছে। আসিবার সময় বাড়ির চাবিটা আন্নাকালীর হাতে দিয়া আসিয়াছে, বিনয় আসিলে দিবার জন্য। ছেলেকে কোনো খবর দেয় নাই—কেন মিছামিছিতাহাকে বিব্রত করা।

কাশীতে নামিয়া মনে একটা অপূর্ব উৎসাহ ও উত্তেজনা অনুভব করিল—বাল্যের সেই কাশী ! এতদিন কি করিয়া ভুলিয়া ছিল সে ! বাংলাদেশের একটা জঙ্গলে-ভরা ছোটপাড়াগাঁয়ে জীবনের ত্রিশটি বছর—

সারাদিন ধরিয়া সে কাশীর পথে পথে ঘুরিয়া বেড়াইল। পঞ্চগঙ্গা ঘাটে স্নান করিল, বিশ্বনাথ দর্শন করিল। বাল্যেরদিনগুলির সঙ্গে জড়িত যে সব জায়গায় একদিনের মধ্যেপায়ে হাঁটিয়া যাওয়া সম্ভব, তাহা সে বড় বাদ দিল না।

কিন্তু ধীরে ধীরে তাহার মনে হইতে লাগিল—কাশী, তাহার সে চল্লিশ বছর আগেকার কাশীকে সে যেন খুঁজিয়াপাইতেছে না, সে কাশী কোথায় গেল ?এ কাশীকে তোচেনে না।

গণেশ-মহল্লায় পুরাতন সঙ্গীদের সন্ধান কেহ জানে না, কেবল রামজীবনবাবুর মেজোছেলে পতিতপাবন পৈতৃকবাটীতে এখনো বাস করিতেছে। পতিতপাবন সতীশকেদেখিয়াই চিনিতে পারিল। বলিল, সতীশদা, তোমার চেহারা তো এখনো বেশ আছে ! আমারও ধরো এই বাষট্টি হল, আমি তোমার চেয়ে বুড়ো হয়ে গেছি—মানে অস্থলের অসুখে আমার—এতদিন ছিলে কোথায় ?

নানা পুরাতন দিনের গল্প হইল। পতিতপাবনের অবস্থা ভালো নয়, ব্যবসায় বার বার ক্ষতিগ্রস্ত হইয়া সর্বস্বান্ত হইতে বসিয়াছিল। তারপর উপরি উপরি দুটি উপযুক্ত ছেলে মারা গিয়াছে। ছোট ছেলেটি রেশমের কাপড়ের ব্যবসা করে বিশ্বনাথের গলির মধ্যে—তাতেই কোনোরকমে চলে। ভাইগুলির মধ্যে কেবল ছোট ভাইটি বাঁচিয়া আছে, পাটনাতে শ্বশুরবাড়ি বাসা বাঁধিয়াছিল, বহুদিন হইলসেইখানেই আছে।

সন্ধ্যাবেলা সতীশ দশাশ্বমেধ ঘাটে চুপ করিয়া বসিল।সম্মুখের হাসি-মাখা, কত অজানা তরণ মুখ—গান...আনন্দের উচ্ছ্বাস...দিব্যেন্দুর কথা মনে পড়িল। দিব্যেন্দুবলিয়াছিল—দাদা, আমি চাকরি করলে তোমার ভাবনাথাকবে না। দিব্যেন্দু জানে না যে, তাহার দাদা লুকাইয়া কাশী চলিয়া আসিয়াছে। এই দশাশ্বমেধ ঘাটে, এই সন্ধ্যাবেলা যেন প্রত্যেক বালককেই মনে হইতে লাগিলদিব্যেন্দু। দিব্যেন্দু না সে পঞ্চগঙ্গা বছর আগেকার নিজে ?

আন্নাকালীর মুখ মনে পড়িল—যখন গরুর গাড়ির পাশেদাঁড়াইয়া ঘরের চাবিটা তার হাতে দিয়াছিল, সে সময়কার তার ছলছল চোখ দুটি মনে পড়িল।

নাঃ সে-ডানপিটে সে আর নাই। কাশীও তার কাছে আরকিছুই না। তার সে কাশী হারাইয়া গিয়াছে।

রাত্রে ঘুম হইল না কত রাত পর্যন্ত। শুইয়া শুইয়া ঠিক করিল সে ফিরিয়া যাইবে। আন্নাকালীর জন্য কাশীর কৌটা লইতে হইবে, ছেলেমানুষ, খুশি হইবে এখন। দিব্যেন্দুরজামার উপযুক্ত খানিকটা সিল্ক, পতিতপাবনের কাছে ধারে লইয়া গেলেই হইবে, গিয়া দাম পাঠাইবে। ভালো পট...বউমা ছবি ভালোবাসে।

কিন্তু সকালে উঠিয়াই সে পতিতপাবনকে বলিল—তুমি একটা উপকার করো ভাই আমার। তোমার এখানে আরকদিন থাকব ?তুমি একটা বাজার-সরকারি গোছের কাজজুটিয়ে দাও দিকি আমায়। অভাবে রাঁধুনীগিরিতেও রাজী আছি। খুব ভালো রাঁধতে পারি, দেখে নেবে তারা।

নাঃ, সে ছেলেকে বিব্রত করিতে ফিরিবে না। ছেলেপারিয়া উঠিবে কেন ? শেষে কি দিব্যেন্দুর কলেজের পড়াবন্ধ হইবে ? বউমার গহনা বন্ধক দিতে হইবে ? ছিঃ—

একটা পেটের জন্য কাশীতে আবার ভাবনা ?